

章氏遺書

第三一冊

章氏遺書外編卷第九

永清縣志四

吏書第一

史家書志一體古人官禮之遺也周禮在魯而左氏春秋典章燦著不能復備全官則以依經編年隨時錯見勢使然也自司馬八書孟堅十志師心自用不知六典之文遂使一朝大典難以綱紀後史因之而詳畧棄取無所折衷則弊之由來蓋已久矣

鄭樵嘗謂書志之原出於爾雅彼固特著六書七音昆蟲草木之屬欲使經史相爲經緯此則自成一家之言可也若論制作備乎官禮則其所謂六書七音名物訓詁皆本司徒之屬所謂師氏保氏之官是其職矣而大

經大法所以綱紀天人而敷張王道者爾雅之義何足以盡之官禮之義大則書志不得係之爾雅其理易見者也

宇文倣周官唐人作六典雖不盡合乎古亦一代之章程也而牛宏劉昫之徒不知挈其綱領以序一代之典章遂使會要會典之書不能與史家之書志合而爲一此則不可不深長思者也

古今載籍合則易存分則難恃如謂掌故備於會要會典而史中書志不妨意存所重焉則漢志不用漢官爲綱領而應劭之儀殘缺不備晉志不取晉官爲綱領而徐宣瑜之品

徐氏有晉官品

亡逸無存其中大經大法因是而

不可窺其全體者亦不少矣且意存所重一家私言難
爲典則若文章本乎制作制作存乎官守推而至於其
極則立官建制聖人且不以天下爲己私也而載筆之
士又安可以己之意見爲詳畧耶

書志之體宜畫一而史家以參差失之列傳之體本參
差而史家以畫一失之典章制度一本官禮體例本截
然也然或有天官而無地理或分禮樂而合兵刑不知
以當代人官爲綱紀其失則散列傳本乎春秋原無定
式裁於司馬畧示區分抑揚咏歎予奪分合其中有春
秋之直筆亦兼詩人之微婉難以一概繩也後史分別
門類整齊先後執泥官閥錙銖尺寸不敢稍越其失則

拘散也拘也非著作之通裁也

州縣修志古者侯封一國之書也吏戶兵刑之事具體而微焉今無其官而有吏是亦職守之所在掌故莫備於是治法莫備於是矣且府史之屬周官具書其數會典亦存其制而所職一縣之典章實兼該而可以爲綱領惟其人微而縉紳所不道故志家不以取裁焉然有入境而問故舍是莫由知其要是以書吏爲令史首領之官曰典史知令史典史之史卽綱紀掌故之史也可
以得修志之要義矣

今之州縣繁簡異勢而掌故令史因事定制不盡皆吏戶兵刑之六曹也然就一縣而志其事卽以一縣之制

定其書且舉其凡目而愈可以見一縣之事勢矣案牘簿籍無文章而一縣之文章則必考端於此常人日用而不知耳今爲挈其綱領修明其書使之因書而守其法度因法而明其職掌於是修其業而傳授得其人焉古人所謂書契易而百官治胥是道也

或謂掌故之書各守專官連牀架屋書志之體所不能該是以存之會典會要而史志別具心裁焉此亦不可謂之知言也周官挈一代之大綱而儀禮三千不聞全入春官司馬法六篇不聞全入夏官然存宗伯司馬之職掌而禮兵要義可以指掌而談也且如馬作天官而太初厯象不盡見於篇籍也班著藝文而劉歆七畧不

盡存其論說也史家約取掌故以爲學者之要刪其與專門成書不可一律求詳亦其勢也既不求詳而又無綱紀以統攝之則是散漫而無法也以散漫無法之文而欲部次一代之典章宜乎難矣

或謂求掌故於令史而以吏戶兵刑爲綱領則紀表圖書之體不可復分也如選舉之表當入吏書河道之圖當入工書充類之盡則一志但存六書而已矣何以復分諸體也此亦不可謂之知言也古人著書各有義類義類既分不可強合也司馬氏本周譜而作表然譜厯之書掌之太史而旁行斜上之體不聞雜入六典之中蓋圖譜各有專書而書志一體專重典章與制度自宜

一代人官爲統紀耳非謂專門別爲體例之作皆雜其中乃稱櫟括也且如六藝皆周官所掌而易不載於太卜詩不載於太師然三易之名未嘗不見於太卜而四詩之目則又未嘗不著於太師也是其義矣

六卿聯事交互見功前人所以有冬官散在五典之疑也州縣因地制宜尤無一成之法如丁口爲戶房所領而編戶煙冊乃屬刑房以煙冊非賦丁而立意在詰奸也武生武舉隸兵部而承辦乃在禮房以生員不分文武皆在學校而學校通於貢舉也分合詳畧之間求其所以然者而考之何莫非學問耶

吏房典吏一人掌一縣之吏事官屬師儒之姓名履歷

事見官縣人之出仕於外及進士舉貢之待銓者事見
師表選舉皆著於籍

掌六房之經制典吏書其受事年月五年役滿申送考
職僉清書之老成者補之吏房典吏一人戶房典吏二
人禮房典吏二人兵房典吏二人刑房典吏二人工房
典吏一人承發房典吏一人糧房典吏二人預備倉攢
典一人庫房攢典一人儒學攢典一人典史攢典一人
典吏庶人之在官者也周官府史胥徒府爲管庫之屬
史則今之書吏也漢唐曹屬掾史多以士流爲之公府
辟署往往起家爲九列廬江小吏乃云仕宦臺閣樂府
詩云十五府小史二十朝大夫三十侍中郎四十專城

居可以想見當時之貴重也明制始禁爲吏不得與鄉會試而生員考下等者乃謫爲吏今禮部學政猶存其制而爲之者卒無其人凡僉吏典畫結狀必云並無過犯及並非生員監生乃得供役是則不許生員監生爲之者也內外衙門典吏俱有額缺領於吏部文選司五年役滿送部考職以正八品從九品未入流等官銓用是爲經制典吏其因事添設本官隨時僉充各以事之繁簡定其名目不在此限

永清舊志不載典吏額缺似失周官府史之義今經制所定知縣衙門十房十五缺儒學一缺典史一缺總十七缺矣以六房之成法論之承發房無所不領當爲吏

房之分科糧房預備倉庫房則皆戶房之分科也初戶房總理錢穀糧房專收里下大糧倉房知米粟數雍正十三年以旗地事繁分戶房爲田租二科田科司永衛船墾民糧河租鹽當房地牙稅一切奏銷而租科則司旗地糧房收十二里民糧

事詳戶書

乾隆二十八年知縣蘭第錫以糧房僅收糧銀事屬櫃書乃裁糧房而歸其事於田科三十四年田科分立庫房專司牙行經紀與銀錢出納之事三十七年知縣劉楸復立糧房旋廢今戶房爲田租倉庫四科田科典吏三人其三科典吏各一人合諸房典吏爲九房十五缺矣

掌憲綱之冊籍以六條之法序其憲綱分其節目而申

明見行之事理一曰吏條二曰戶條三曰禮條四曰兵條五曰刑條六曰工條

吏條一曰僚屬知縣典史儒學教諭訓導河工縣丞主簿之員數也二曰闔屬僧會司道會司陰陽學醫學之員數也三曰縣屬在任之官縣人之官於京師及外省者也在籍之官縣人之已仕而歸與未仕待銓及進士舉人恩貢生拔貢生副榜貢生歲貢生優貢生也四曰六房經制吏戶禮兵刑工承發糧倉庫房及儒學典史之典吏攢典名數也

戶條一曰存恤額設孤貧之月糧布花也二曰銀庫徵解存留之有無也三曰戶口人丁丁糧之額數也四曰

課程牙行雜稅之多寡也五曰差繇上司之衙役工食與造報戶口人丁之分則也

禮條一曰學校廩膳增廣附學武生之名數與三六九之會課也二曰壇宇山川社稷先農之壇宇坐落方向也三曰山林隱逸登注山林隱逸之有無也四曰忠孝節烈登注其人之事實也五曰鄉飲言其禮之行否也兵條一曰舖遞人遞郵傳也二曰急遞驛馬之數也刑條一曰詞訟上司批詞與自理之詞訟也二曰監獄犯人疾病醫藥有無禁卒凌虐也

工條曰所屬橋梁道路有無修理行人往來有無稽誤也

夫史志之文貴存大體非以其義例也所貴勿忘其初
意爾六條之頒著於憲令相安既久官吏行文書不知
者且以爲故事矣時事有廢興吏治有緩急雖周官六
典未必盡爲當日所施行然而聖人不爲不盡施行而
不著其法爲其可以因是而想見立法之初意焉爾庶
幾知所重輕也然則六條固州縣之所首務也凡州縣
皆有之亦夫人而知之而必登之於志者恐後此將有
不復知之者耳

掌官員之頒給印信與鈐記劄付之請領於禮部與布
政使司者乾隆十五年七月頒發永清縣乾字四千一
百九十二號印信一顆乾隆十六年四月頒發儒學乾

字五千六百二十二號印信一顆乾隆十七年四月頒
發南岸五工乾字一萬七百三十七號關防一顆乾隆
十七年四月頒發北岸五工乾字一萬七百六十九號
關防一顆乾隆三十五年五月頒發捕衙布字一千零
五號鈐記一顆乾隆四十二年九月頒發僧會司僧會
布字一百四十八號鈐記一顆乾隆四十二年九月頒
發道會司道會布字一百四十九號鈐記一顆乾隆四
十二年九月頒陰陽學訓術布字一百五十號鈐記一
顆

戶書第二

史遷平準之書與天官同義蓋猶以官名篇而不以事

名篇也班史既易天官爲天文又易平準爲食貨於是立官置典之義始蕩然而無可復究矣州縣方志則戶口田糧之目土產貢賦之名方且紛裂散亂漫無統紀求能如史志之敘食貨固已百不得一矣況能上而推蹟官守以存六典之遺乎夫史遷入書僅舉二官餼羊之存禮意爾班固并此去之後代史志不復爲之數典焉於是修江南通志者遂致疑於丁役非食貨而土產不類於田賦因欲紛更其門類是則不得不爲食貨天文諸篇長太息也

田賦之事其義易明其數難知也其義易明則輸將沿爲固然其數難知則官吏易爲奸弊矣舊制貢賦款目

浩繁明嘉靖中始爲一條編法萬厯九年始通行之總括一縣賦役糧地計丁畢輸於官而僉差募運之費存留供億之用土貢方物之需以及交納贈耗之數併爲一條則民間應納之款盡於是矣然而輸納歸於一條官民固爲交便舊存款目不復一一臚於文冊則設有不肖官吏私立名色浮征橫歛人且茫然不知其故也力役之征古今通義而旣算僉差募運則條編已有力役矣官司贍給國制恆經而旣算存留供億則條編已具贍給矣土貢方物交納贈耗條編詳今而略古便於官府文移耳州縣志書僅載條編而不溯原委則不復知制度之沿革民間將有受其弊者矣求之而不得著